

Rom

1 ¹Aya Pol, Kristus Jesus nē ferfer, aposel wō auf nigin iweigna fen, Negur nē biya od wogō auf nigin igirnan. ²Biya od anī, Negur kulu bagai yogon profet promis od irokenēdi di, Negur nē Itotoya Fateul bun ditoton, ³are yogon Naal, neda Odug Jesus Kristus nigin, ī tamo nē ibor bun are, Dawid nē ibor bun wō yen, ⁴agef fen, fateul nē Awa Ur bunem, ī laa bun tamal kel turī fiyen anim, Negurem Jesus ī Yogo Naal megeir barikā ado anī yaor kurō fesin. ⁵Ī bunem, amā yogon yana seli kulō fiya nigin, haiden ganan atun temeleid, tamo kayau maweignēdi di, idi momoi de fen, dō difouf nigin, amā wau ifenēya ado aposel nē kabī malen. ⁶Āg, Jesus nē tamo kayau wowā douf nigin iweignēdif anidi atun, ubodōgef.

⁷Tamo kayau ganan Rom taun ubodōgef, Negur ā nigin wau laaf fen, tamo kayau fateul wō gouf nigin iweignein, ā bun pas enei atotof.

Wau ifenēya ado wau inosiya, neda Tamada Negur ado Odug Jesus Kristus bunem, ā bun isiyouf.

Pol Rom Ileya Nigin Bagai Wau Iron

⁸Uruwa bagai, aya ā ganan nigin, Jesus Kristus bunem, neu Negur de afiyek, ere nigin, āgenei momoiya nigin teneub ganan bun od iyokelen. ⁹Negur ī nigin aya wau adok iro ken, ī Naal nē biya od wogōya bun aruna aledig, ī ileya mog, aya ā nigin toku neu kosēya bun faimud karī auledig. ¹⁰Age afe fen, gama Negur orouf are, naab kā fele di, aya ā gein asiyouf nigin aya kosē auf.

¹¹Aya ā ileyeīya nigin bagai wau irok, are aya uur nē ege luwa tunī megeir ifareya nē anī afeneif nigin age afef, ¹²anī bunem, aya ā geid, mugu mugu āgenei momoiya ado neu momoiya bunem abob tasennēf. ¹³Turau tar, aya ā enei to keleī youf anī to orouf, aya, sain musei, ā gein isiya nigin kisi afen, anī ere, aya age fiya nigin, naab katī felef isi, gama enei bun, are aya, Juda sā anidi tunī ganan atun, age afen gen, ā atuneg gei ayeif nigin age afen.

¹⁴Negur aya isennan nigin, aya ī bun wareg ado. Anī nigin, Aya, tamo Grik od ado dogo neid tobonuneid keleī anidi ado, tamo Grik od ado dogo

neid tobonuneid keleī sã anidi bun, kisi biya adodo, nene yedidiya buneg, wareg enei aūf. ¹⁵Age fiya nigin, aya Rom taun ubodōgef ā buneg, biya od anī wogōya nigin kisi totol alef.

¹⁶Aya biya od nigin to mama fiyaf, ere nigin, are Negur nē megeir, tamo ganan momoi def, kel gei foug nigin, Juda idi bun keteme di, Juda sã anidi idi buneg age foug. ¹⁷Ere nigin, biya od bun, Negur ī tamo kayau yogon mala bun madur bagai inenēdiya nē naab anī kurō fesif, Negur ī tamo kayau yogon mala bun madur bagai inenēdiya nē naab anī momoiya bunem dogol isif, are Negur nē Itotoya bun ibodok kilei, “Madur tamo momoiya bunem mata ibodōf.”^a

Negur Nē Didi Tenebur Tamo Bun Isiyouf

¹⁸Negur nē didi, saa ilun tamal, tamo idi dogo neid sanem momoi anī lai difedig anidi neid mosor ado sane ganan bun yaoref, ¹⁹ere nigin, ereb Negur nigin idi keleī youf are, idi bun yaor, ere nigin, Negur ī idi bun anī yaor fen. ²⁰Negur teneub saa ado kare fen sain bunem isi gamag, Negur nē tobonunā ileya kisi feleya sã anī, are in ibodkeleya megeir ado ī Negur ya anī, idi yaor diledig. Ereb Negur inodin anī bunem idi keleī, anī nigin, tamo idi galā taka sã.

²¹Idi Negur kelein, anī ere, idi ī Negur gen to yana dales fen, de difiyēdig, anī ere, idi neid kisi nene yel fen, idi neid waud neneya anī bunem dogo neid waud gugum kerū felen. ²²Idi amā kisi biya ado dedig, anī ere, idi neneya wowā de fen, ²³idi to bura leya Negur nē fula fiya medeīya anī falei difel, bura leya nē tamo, ninā, gaar ado, gaar luwedim diyōdig imedim meleidkanon dinon anī bun dinon.

²⁴Anī nigin, Negur idi itornēdi di, idi neid waud irōya sane dō de, noli mosor dino amuyē bun dile fen, idi neid bouwedim abob mama difenēdig. ²⁵Idi Negur nē momoi anī falei difel, idegēya bun dinon, age de fen, idi Negur ereb ereb kare fen anī ban, ereb ereb Negurem kare fen idi yeneid anī dales fen, aruneid daledig. Negur ī faimud yana yaleseyauf. Momoi.

²⁶Enei nigin, Negur idi mama nē oroya bun itornēdi di, dilen. Idi neid kayaug, Negur bagu fedin geid bouweid bagu fiya ditor ken, falei del, kayau tutur Negur bagu fediya sã anidi geid bouweid bagu difedig. ²⁷Age fiya bagai, tamog Negur kayau ado bagu fedin anī ditor ken, idi abob bun noli nigin yā gaī de genen. Tamo, tamo tunī geid mama tobonunā age dife fen, idi neid idodōya mala darau dogo ke de dalen.

²⁸Idi Negur nigin keleī yaleya ditoron, anī nigin, Negur idi itornēdi di, idi neid kisi sanel fen, idi ereb ereb to age fiya nē anī age difedig. ²⁹Idi tobonunā madur fiya sã fire fire ganan, sane, safina nigin neu dogol yeya ado, to ile oroya anim isokosen. Idi kiyēī, tamo yukesiya, kusī, idegēya

^a 1:17 Habakuk 2:4

ado, sanem barikā. Idi dumen od wogō dedig, ³⁰idi bou yūya od wogō dedig, Negur dudum difiyēdig, idi kono difedig, idi akoreid dūdig, idi dogo yeneid dalesedig. Idi sane age fiya nigin naab dimirēdig. Idi sineid temeid tar sigoreid to dō difedig. ³¹Idi kisi biya sã, momoiya sã, waud laa fiya sã, waud yūya sã. ³²Idi Negur nē lo kelei, are idi anī age difef laa gurug difouf, anī ere, idi anī dogol to age difef diledig, anī ere, idi tunī anī age difedig anidig waud difenēdidig.

Negur Nē Es Fiya Madur Bagai

2 ¹Anī nigin, ō galā taka sã, ō aib taka es wiyēdig, ereb taka bun es wiyek, ō ogo boū uk, ere nigin, ō taka es wiyek, ō ogog de ago wodig. ²Ada kelei, Negur nē es fiya idi age difef anidi bun isif, are momoi nē bun Negur es fedig. ³Anī nigin, tamo ō aib, tunī age difef anidi es wiyēid fen, ōg anī ago wodig, ō Negur nē es fiya anī wal afouf wof de? ⁴Ō, Negur nē biya fiya ō waū faleiya bun iroyō isif anī to kelei ken, yogon biya fiya, molol ado, feseya sã, idi kisi feleya bagai anī, ō kono wof de?

⁵Anī ere, ogon waū total ado ogon waū faleiya sã bunem, ō ogo nigin Negur nē didi wō youf naa bun walouf nigin didi kuru wof, sain anī bun Negur nē es fiya madur bagai anī yaorouf. ⁶Negur ī “mugu mugu ereb age difef kilei ifenēdiyof.”^b ⁷Idi feseya sã ereb biya age difef bunem, fula fiya medeīya, yana ado, to bura leya dimirēdig anidi, mata ibodkeleya ifenēdiyof. ⁸Anī ere, idi dogo nigin dogol kisi de fen dimirē di, idi momoi anī ditor ken, sane dō difedig anidi bun, didi ado seyeya wō youf. ⁹Morō ado darau, tamo sane age difedig ganan bun wō youf, Juda idi bun keteme di, haiden idi buneg age fouf. ¹⁰Anī ere, fula fiya medeīya, yana ado, wau inosiya, idi biya age difedig ganan bun wō youf, Juda idi bun keteme di, haiden idi buneg age fouf. ¹¹Ere nigin, Negur ī Juda ado haiden, es fiya tekelei bunem es fediyof.

¹²Idi Moses nē lo sa ken, mosor dinof gananeg, Moses nē lo sã daū falauf, idi Moses nē lo farumen dibod ken, mosor dinof ganan, Moses nē lo nem es fediyof. ¹³Negur mala bun, idi lo karī dedig anidi madur bagai sã, anī ere, idi lo dō difedig anidi, Negur mala bun madur bagai youf. ¹⁴Haiden idi lo sã dogo neid kisim ereb ereb lo irok kilei age difedig, idi lo sã, anī ere, idi dogo, dogo nigin lo. ¹⁵Idi ereb ereb lo irok anī dogo neid waud bun itoton anī yaor difef, anī nigin, dogo neid kisi es fiya waud bun ibodok animeg, are momoi anī, yaor fe di, dogo neid kisim dogo bouweid yu ken, isenneid mog fef. ¹⁶Neu biya od, Jesus nigin tamo kayau arokenēdif anī irok kilei, Negur Jesus Kristus bunem, tamo nē wau bun iminek anī es fouf naa bun, enei agef bagai wō youf.

^b 2:6 Sam 62:12; Proverb 24:12

Juda Tamo Kayau Ado Lo

¹⁷Ō ogo nigin aya Juda tamo wof; ō lo bun ufar fen, aya Negur ado nigal mauf wo fen, yanā walesef; ¹⁸ō lom faded yō di, ō Negur nē oroya kelei ken, ereb madur bagai anī ō biya wof; ¹⁹ō ogo nigin momoi wof, are ō mala ifofakeleya neid ulum irouya tamo, ō idi gugum bun difaref anidi neid lalan, ²⁰ō neneya tamo neid tai fiya tamo, ō momou neid tise, ere nigin, ō lo bun kelei ado momoi anī barikā, ²¹age fiyauf are, ō tunī ufelnēdidig, ō ogo to ufelnēdig de? Ō to bē walegei wodig, ō ogo bē waledig de? ²²Ō to seseirā unoi wodig, ō seseirā unodig de? Ō idegēya waitou anī to bagai oroyōdig, ō dogo neid tempel bun bē waledig de? ²³Ō aya lo ado wo fen, yanā walesedig, ō lo ifodulūya bunem Negur mama wenēdig de? ²⁴Are Negur nē Itotoya bun ibodok kilei, “Ā bunem, haiden atun Negur yana kono difiyek.”^c

²⁵Ō lo dō wof are, mulū are isennok, anī ere, ō lo ufodulōf are, ō mulū ileyā sā gen wō wof. ²⁶Anī nigin, idi mulū ileyā sā anidim lo irok kilei dō difouf are, idi mulū ileyān gen to ileidiyauf de? ²⁷Taka ī mulū to ile fen, lo dōf el fouf are, ī, ō lo itotoya ado fen, mulū ulen, anī ere, ō lo ifodulūya tamo ye fen, to es yōf de?

²⁸Tamo ī bouwam dogol Juda tamouf, ī Juda tamo bagai sā. Bouwam dogol mulū ilef, areg mulū bagai sā. ²⁹Anī ere, tamo ī name bun Juda tamouf, ī Juda tamo bagai. Mulū bagai are, Awa Uurem, waud bun age fedig, lo itotoya bunem sā. Tamo age fiya, tamo bunem yana yaleseya to yaledig, anī ere, Negur bunem yaledig.

Negur Age Afouf Yen Are Ī De Age Fouf

3 ¹Age fiyauf are, tamo ī aya Juda tamo yef bun, ere biya yalouf? Mulū bun ere biya adouf? ²Naab ganān bun musei! Uruwa bagai, Negur nē od idi kulatun difouf nigin imeid bun inon.

³Juda tunī momoiya sāf are, naig fouf? Idi neid momoiya sā anim, Negur age fouf yen anī to age fouf de? ⁴To bagai agef ilauf! Negur ī momoi bagai, age fe di, tamo ganān idegēya temeleid tauf. Are Negur nē Itotoya bun ibodok kilei,

“Are sain ō wogō wouf bun, ō madur bagai anī yaorouf, sain ō es diyōf bun, ō wal wediyouf nigin.”^d

⁵Anī ere, ada neda madur bagai sā anim, Negur nē madur bagai fatuk bagai yaor fouf are, ada ere tauf? Negur ī ada bun yogon didi ifanadauf nigin, ī madur sā tauf de? Aya tamo nē luwa irouya anī wogō auf. ⁶To bagai agef ilauf! Age fiyauf are, Negur tamo kayau naig fe es fediyouf? ⁷Taka nem monē ye fen, irōf, “Neu idegēya anim Negur nē momoi bagai

^c 2:24 Asaia 52:5; Esekiel 36:22 ^d 3:4 Sam 51:4

anī yaau du fe di, anī bunem, yogon fula fiya medeīya odugouf are, ere nigin aya fau mosor tamal ya ani, bouwau bun inouf?”⁸ Ere nigin to eig youf, “Biya anī wō youf nigin, ada sane age tafouf” youf? Tunī amam od enei wogō maudig de fen, amā bouwamā yūya od dirōdig. Negur idi es feid fen, mala solo ifenēdiyof.

Aibem Taka Madur Bagai Sā

⁹Amā ere mauf? Juda amā haiden wal fediya de? Gai sā bagai! Amā mogo, Juda ado haiden geid ganan mosor farumen kilei kilei dibodok ya anī, moron. ¹⁰Are Negur nē Itotoya bun ibodok kilei,

“Madur bagai taka to ibodok, tekelei bagaig sā;

¹¹ taka nem kisi fokōya sā,
taka nem Negur imirēya sā.

¹² Ganan Negur nē naab fasis dife fen,
ganan sesen len;
aibem taka to biya age fedig,
tekelei bagaig sā.”^e

¹³ “Idi neid uleidbanī, laa nē meku awa dede fiya sā gen;
idi neid baleid idegēya wogō dedig.”^f

“Gogour sane nē mū sigoredin ibodok.”^g

¹⁴ “Idi neid eweid, isisiya ado dirikeī bagai.”^h

¹⁵ “Idi neid yeid, tamo didenkesiyof nigin tuninirya sā kaisā bagai dirādig;

¹⁶ idi neid iyōya bun, daū fiya ado morō dinodig,

¹⁷ age de fen, wau inosiya nē naab idi keleī sā.”ⁱ

¹⁸ “Idi neid meleid bun, idi Negur nigin kumī sā.”^j

¹⁹Gama ada keleī, ereb lo irok are, idi lo farumen dibodok anidi irokenēdif, anī bunem, eweid ganan omutukul del fen, tenebur tamo kayau ganan Negur nē es fiya farumen dibodōf. ²⁰Anī nigin, Negur ī, lo dō fiya bunem, ī mala bun taka ī madur bagai to youf. Age fiya nigin, lom ada mosor tanon anī yaor fadadig.

Madur Bagai Are Momoiya Bunem

²¹Anī ere, gama Negur ī tamo kayau yogon mala bun madur bagai inenēdiya nē naab, are lo bunem sā anī yaor fen, are Lo ado profet neid wogōya bun kurō difesin. ²²Negur ī tamo kayau yogon mala bun madur bagai inenēdiya nē naab enei, Jesus Kristus nigin momoiya bunem, idi momoi def ganan bun isif. Juda ado haiden bun de tekelei, ²³ere nigin, ganan mosor dinon, anī nigin, taka nem Negur fula fiya medeīya bun

^e 3:12 Sam 14:1-3; 53:1-3; Eklisiastis 7:20 ^f 3:13a Sam 5:9 ^g 3:13b Sam 140:3

^h 3:14 Sam 10:7 ⁱ 3:17 Asaia 59:7, 8 ^j 3:18 Sam 36:1

ibodok ī wagen ileyā kisi feleyā sã. ²⁴Age dife di, Negur nē wau ifenēya anim, kel gei fiya Kristus Jesus na yaledin bunem isin anī bunem, idi ege bagai madur bagai inodif. ²⁵Negur ī, Jesus nē naud bun momoiya bunem, Negur nē didi yof fen, tamo kayau neid mosor yalelkenēdiya kabī yalouf nigin, Negurem Jesus sesewi fouf nigin inenen. Ī yogo madur bagai ya anī yaor fiya nigin, enei age fen, ere nigin, in molol bunem, uruwa mosor dinon anī mala solo ifenēdiya sã itornēdin. ²⁶Sain enei bun, ī yogo madur bagai ya anī, yaor fiya nigin age fen, are ī yogo madur bagai ye fen, taka ī Jesus bun momoiya ado ī madur bagai youf nigin age fen.

²⁷Age fiyauf are, yana yaleseya anī nain? Yana yaleseya are sã. Ere gariya bunem? Lo dō fiya bunem de? Sã, momoiya bunem. ²⁸Ere nigin, ada keleī, Negur ī tamo nē momoiya bunem madur bagai youf, lo dō fiya bunem sã. ²⁹Negur ī Juda neid dogol de? Ī haiden neid sã de? Eo, ī haiden nedig Negur. ³⁰Negur ī tekelei, ī mulū dilen anidi, momoiya bunem madur bagai youf, agef fen, mulū ileyā sãg, momoiya de tekelei anim madur bagai youf. ³¹Age fiyauf are, ada momoiya eneim lo anī tadodōf de? Sã bagai. Age fiya ban, ada lo tarou kafī tafalauf.

Negur Abraham, Ne Momoiya Bunem Madur Bagai Yen

4 ¹Age fiyauf are, ada Juda tubuda Abraham, ere anī ī gurug fen nigin, ere taut? ²Abraham yogon kabī bunem, madur bagai inenem are, Abraham ī yogo yana yaleseya nigin ereb taka adom, anī ere, Negur mala bun sã. ³Negur nē Itotoya ere ye irok? “Abraham Negur nigin momoi ye di, Negur ī Abraham madur bagai yen.”^k

⁴Tamo taka ī kabī yalef, yogon mala solo are ege luwa ifenēya gen sã, are kabī mala. ⁵Anī ere, tamo ī madur bagai wō youf nigin kabī to yale fen, Negur, ī dō fiya sã anidi madur fedidig, ī nigin momoi yef, Negur yogon momoiya are madur bagai yef. ⁶Dawid īg, tamo kabī bunem sã, Negur madur bagai yen, tamo anī nē el fiya nigin wogō yen:

⁷“Idi neid kū fenēya nigin weder tu keledig,
idi neid mosor yaleledig,
are el fedif.

⁸Tamo ī yogon mosor nigin Odug to bagai iwesnēf,
ī el fiyek.”^l

⁹El fiya enei mulū ileyā neid dogol de? Sã, are mulū ileyā san neideg. Age fiya nigin, amā morōdig, Negur Abraham nē momoiya bunem ī madur bagai yen. ¹⁰Ere sain bun Negur ī age yen? Ī mulū ilel mog de, mulū ileyā sã mog? Ī mulū ilel mog sã, ī mulū ileyā sã mog. ¹¹Ī mulū ileyā nē uris, are ī fau mulū ileyā sã mog, momoiya bunem Negur madur bagai yen anī nē uris yalen. Anī nigin, ī mulū ileyā san momoi def ganān neid

^k 4:3 Jenesis 15:6, 22 ^l 4:8 Sam 32:1, 2

temeid, anī bunem, Negur idi madur bagai youf. ¹²Ī mulū ileya nedig temeid, idi mulū dilen dogol sã, anī ere, idi tubuda Abraham ĩ mulū ileya sã mog, momoiya ado iyon anī yebura dō de diyōdig anidi nedig.

¹³Negur, Abraham ado in tubu tar irokenēdin, are Negurem ereb ereb ganan idi afenēdi di, akorediyouf yen anī, lo bunem sã, anī ere, madur bagai momoiya bunem isif anī bunem. ¹⁴Idi lo dō difedig anidim, Negurem ereb ereb ganan idi afenēdi di, akorediyouf yen anī akorediyouf are, momoiya are ege ile di, ereb Negur iron are ege kilēf, ¹⁵are lo didi irou isidig nigin. Lo sãf are, lo ifodulūyag sã.

¹⁶Anī nigin, ereb Negur age afouf yen are, wau ifenēya bunem, kabī yalef ya anī yaorouf nigin, momoiya bunem isidig, are Negur ĩ, ege luwa Abraham nē ibor nē tubu tar ganan afenēdiyof yen anī, megeir fiya nigin age fedig, idi lo dō difedig anidi bun dogol sã, anī ere, idi Abraham nē momoiya dō difedig anidi buneg. Age fiya nigin, Abraham ĩ, ada ganan neda tamada. ¹⁷Are Negur nē Itotoya bun ibodok kilei, “Aya ō teneub akor musei neid temeid anenon.”^m Negur mala bun, ĩ neda tamada, Abraham Negur nigin momoi yen, Negur ĩ tamo gare den mata ifeneid fen, ereb to ibodok anī iweig di, agef wō yedig, Negur ĩ anī.

¹⁸Wau iseya nigin gariya taka sã bun, Abraham in wau iseya bun momoi yen, are ĩ teneub akor musei neid temeid wō youf nigin age fen, are Negur ĩ eig ye irokenen kilei, “Ogon ibor agef yenēf.”ⁿ ¹⁹In momoiya bun felu reya sã, ĩ handred yar age fiya ibodon nigin, yogon bouwa anī laa gen ile fen, Sara kesu yaleya nigineg laa gen ilen. ²⁰Anī ere, ereb ĩ Negur iron anī nigin to wau uru fen, in momoiya to ilef isi fen, anī ere, ĩ yogon momoiya megeir fe fen, Negur fula fiya medeīya ifenen. ²¹Abraham ĩ, ereb Negur age afouf yen anī age fiya nigin, ĩ megeir ado, ye fen, momoi bagai yen. ²²Anī nigin, Negur, Abraham nigin ĩ madur bagai yen. ²³Od “Negur ĩ nigin madur bagai yen” are, ĩ nigin dogol to itoton, ²⁴anī ere, Negur ada nigin madur bagai youf anī nigineg itoton, are ada, Negur, neda Odug Jesus tamo gare den bun tamal kel turī fiyen nigin, momoi tauf anī. ²⁵Negur ĩ Jesus neda mosor nigin laa bun inene ken, ada madur bagai youf nigin, Jesus mata kel turī fiyen.

Maror Kuliya Ado

5 ¹Anī nigin, momoiya bunem, Negur ada madur bagai yen nigin, ada neda Odug Jesus Kristus bunem, Negur ado maror bun tabodok. ²Neda momoiya bunem, Jesus Kristus ĩ, ada Negur nē wau ifenēya enei ada gama an tafaref anī namen irou ileda di, telen. Anī nigin, ada Negur nē fula fiya medeīya nigin, wauda ise fen, kulī taudig. ³Anī nigin dogol sã, ada neda morō nigineg kulī taudig, ere nigin, ada keleī, morō bunem

^m 4:17 Jenesis 17:5 ⁿ 4:18 Jenesis 15:5

feseya sã anī wō yedig, ⁴feseya sã anī bunem atīya biya wō yedig, atīya biya bunem wau iseya wō yedig. ⁵Wau iseya anim ada to fō fadadig, ere nigin, Awa Uur Fateul Negurem ifanadan anī bunem, in wau laa fiya ada wauda bun fi felen.

⁶Ada fau maleg tabod mog, in sain bun bagai, Kristus ī, ada Negur dō fiya sã anidi nigin laa fen. ⁷Tamo takam, taka madur bagai nigin, laa fiya malai bagai, agef fen, tamo takam aib taka tobonunā biya ado nigin totol ino fen, laa fouf be. ⁸Anī ere, Negur ada nigin yogon wau laa fiya anī, enei bun ada ifelnadaf, are ada fau mosor bun tabod mog, Kristus ada nigin laa fen.

⁹Gama yogon naud bunem, Negur ada madur bagai yen nigin, ada ī bunem Negur nē didi bun tamal baban momoi bagai yalelkanadauf! ¹⁰Sain ada Negur nē kiwai tamo tar tabod mog, yogon Naal nē laa bunem, ada ī geid komo fadan. Gama ada ī geid komo fadan nigin, baban momoi bagai, Kristus nē mata bunem ada kel gei fadauf! ¹¹Enei dogol sã, anī ere, ada, ereb Negur neda Odug Jesus Kristus bunem age fen nigineg kulī taudig, are Jesus Kristus bunem, ada gama komo fiya talen.

Adam Bunem Laa Wō Yen, Kristus Bunem Mata Wō Yen

¹²Anī nigin, tamo tekelei bunem, mosor ket tenebur wō ye di, laa mosor bunem wō yen, age fiya bagai, ganan mosor dinon nigin, laa, tamo ganan bun wō yen. ¹³Lo wōya sã mog, mosor tenebur ibodon. Anī ere, lo sãf are, mosor to iwesauf. ¹⁴Anī ere, Adam nē sain bunem ile Moses nē sain bun, idi Adam age fen gen, to Negur nē itāfiya wal difen anidig laa farumen dibodon, Adam ī taka fau isiyouf nē malakanon.

¹⁵Anī ere, Negur nē ege luwa are mosor Adam inon gen sã. Tamo tekelei nē mosor bunem musei gare den ouf are, Negur nē wau ifenēya ado ege luwa, tamo tekelei Jesus Kristus nē wau ifenēya bunem isin, naig fiya bagai tamo musei bun gogū fouf! ¹⁶Takag age fiya, Negur nē ege luwa are, tamo tekelei nē mosor mala age fiya sã. Es fiya mosor tekelei dōf fen, mosor inon nigin bouwa bun od yūya irou isin, anī ere, ege luwa mosor musei dōf fen, madur bagai anī irou isin. ¹⁷Tamo tekelei nē mosor bunem, laa anī, tamo tekelei anī bunem mudur ibodon ouf are, idi Negur bunem, wau ifenēya barikā ado, madur bagai anī nē ege luwa barikā dalef anidi, momoi bagai, tamo tekelei Jesus Kristus bunem, mata bun mudur dibodōf!

¹⁸Anī nigin, mosor tekelei bunem, Negur tamo ganan mosor temeleid yen, age fiya gen, madur bagai tekelei age fen bunem, Negur tamo nigin madur bagai ye fen, tamo ganan nigin mata irou isin. ¹⁹Tamo tekelei nē od wal fiya bunem, musei mosor adodo wowā den, age fiya gen, tamo tekelei nē dō fiya bunem, musei madur bagai wowā douf.

²⁰Mosor ifageya nigin, lo isin. Anī ere, mosor ifaga di, Negur nē wau ifenēya fatuk bagai ifagan, ²¹are mosor laa bun mudur ibodon gen, wau

ifenēya madur bagai bunem mudur ibod ken, neda Odug Jesus Kristus bunem mata ibodkeleya irou isiyouf nigin age fen.

Mosor Bun Laa, Kristus Bun Mata

6 ¹Age fiyauf are, ada ere tauf? Negur nē wau ifenēya ifagauf nigin, ada mosorei tauf de? ²Sā bagai! Ada mosor bun gare taun; naig fe di, ada anī bun tau tabodōf? ³Ada ganan Kristus Jesus bun naan talen, are yogon laa bun naan talen anī, ā to keleī de? ⁴Anī nigin, ada, laa bun naan talen bunem, ī geid mū fadan, are Kristus, Tama nē fula fiya medeīya nē megeir bunem, tamo gare den bun tamal kel turī fen gen, adag ibodōya mata bun mata tabodōf nigin age fen.

⁵Ada yogon laa bun, enei gen ī geid bagu fadan ouf are, ada momoi bagai yogon kel fāya buneg, ī geid bagu fadauf. ⁶Ada keleī, mosor nē bouwada yukesiyouf nigin, neda oroya tubu ī geid aa tetek bun yun, are ada mosor nē ferfer to tabodōf nigin age fen, ⁷ere nigin, taka ī laa fen are, ī mosor nē megeir bun tamal yalelen.

⁸Ada Kristus geid gare taun ouf are, adag ī geid mata tabodōf nigin momoi tauf. ⁹Ere nigin, ada keleī, Kristus tamo gare den bun tamal, kel turī fiyen nigin, ī baban to bagai laa foug, ī laa nē megeirem baban to ironēf. ¹⁰Ī laa fen are, ī mosor nē megeir yukesiyouf nigin, sain tekelei bun dogol laa fen, anī ere, mata ī ibodok are, ī Negur bun mata ibodok.

¹¹Age fiya bagai, ā aug nigin, mosor bun gareg fen, Kristus Jesus bunem, Negur bun mata ubodōgef anī kisi gouf. ¹²Anī nigin, āgenei bouweī bura leya nē anī bun, mosor mudur ibodō di, ā in oroya sane anī dō gouf nigin to ago gouf. ¹³Āgenei bouweī tunī, sane nē aruna yaleya nigin mosor bun to wenēgouf, anī ere, idi laa bun tamal kel turī fedin gen, ā aug Negur wenēg fen, āgenei bouweī tunī, madur bagai nē aruna yaleya nigin Negur bun wenēgouf. ¹⁴Mosor āgenei odug to ibodōf, ere nigin, ā lo farumen sā, wau ifenēya farumen ubodōgef.

Madur Bagai Nē Ferfer

¹⁵Age fiyauf are, naig fiya? Ada lo farumen sā, wau ifenēya farumen tabodok nigin, mosor tanouf de? Gai sā bagai! ¹⁶Sain ā aug, taka sigor dōg fen, ferfer gen ī aruna walegef, ā taka sigor dō gef anī nē ferfer ubodōgef anī, ā to keleī de? Ā mosor nē ferfer ubodōgef, are laa bun irouleyeik, ā Negur dō fiya nē ferfer ubodōgef, are madur bagai bun irouleyeik. ¹⁷Anī ere, ada Negur de tafiyēf, ere nigin, ā uruwa bun mosor nē ferfer ubodōgen, anī ere, ā tai fiya difenein anī, āgenei wauī adok dō gen. ¹⁸Ā mosor bun tamal yaleneī di, madur bagai nē ferfer wō gen.

¹⁹Aya, ā bouweī bun felu reya nigin, tamo nē tobonunā bunem wogō auf. Ā uruwa bun ferfer gen, āgenei bouweī, sane amuyē ado bun unogen, ago ge di, fatuk bagai sane len, age fiya gen, gama ā ferfer gen, āgenei

bouweï, madur bagai bun unoge di, fateul bagai wō gouf. ²⁰Sain ā mosor nē ferfer ubodōgen, ā madur bagai nē farumen to ubodōgen. ²¹Sain anī bun, ereb ā gama mama yeik bun tamal, ā ere mala biya walegen? Anī ganan are, laa bun irou isif. ²²Anī ere, ā gama mosor bun tamal yalelneï di, Negur nē ferfer wō gen, anī nē mala biya are, fateul bun irouleyeik, anī nē kaū are, mata faimud ibodkeleya. ²³Ere nigin, mosor mala, are laa, anī ere, Negur nē ege luwa, are neda Odug Kristus Jesus bun mata faimud ibodkeleya.

Tamo Kayau Bagu Fiya Bun Od Malakanon

7 ¹Turau tar, aya, Moses nē lo keleï tamo ā arokeneik, lo are tamo mata ibodok sain bun dogol, i bun megeir ado anī, ā to keleï de? ²Eig fiya gen, lo irok, kayau tamo aiwaf, i tamo mata ibodok sain bun dogol i aiwaf, anī ere, i aiwa laa fouf are, kayau i bagu fiya nē lo farumen to ibodōf. ³Age fiya nigin, kayau i aiwa monog fau mata ibod mog, i baban tamo taka yalouf are, i seseirā kayau douf. Anī ere, yogon tamo laa fouf are, lo anim kayau to ironē di, i tamo taka yaloufeg, i to seseirā kayau douf.

⁴Anī nigin, neu turau tar, āg Kristus bouwa bunem lo bun gare gen, are ā, taka i tamo gare den bun tamal kel turī fiyen anī nē wowāg fen, ada Negur bun faat biya taūf nigin ago gen. ⁵Sain ada bouwa nē oroyam ironadan bun, lo anim mosor nē oroya turī fe di, mosor nē oroya anim bouwada bun kabī yalen, anī bun, ada laa nē faat taun. ⁶Anī ere, gama ada ereb mogo ironadan bun gare taun nigin, ada lo bun tamal yalelnadan, anī nigin, ada Awa Uur nē naab mata bun aruna talef, naab tubu lo itotoya bun sā.

Mosor Ado Kusīya

⁷Age fiyauf are, ada ere tauf? Lo anī mosor de? Sā bagai! Momoi, lo sam are, aya mosor are ereb yef anī to keleim. Ere nigin, taka nē safina ile to oroya nigin lo to age ye irom are,^o aya taka nē safina ile to oroya nigin to keleim. ⁸Anī ere, itāfiya anim mosor modoū ifenē di, aya nameun mosorem taka nē safina ile oroya fire fire ganan inodin. Ere nigin, lo sāf are, mosor are laa fen. ⁹Uruwa aya lo sā bun mata abodon, anī ere, itāfiya isi di, mosor mata fā ye di, ¹⁰aya laa fiyan. Lo anī mata ousiyoun aun, anī ere, i momoi bagai laa ousin anī ailen.

¹¹Ere nigin, itāfiya anim mosor modoū ifenē di, mosorem aya idegna fen, itāfiya bunem laa bun inenan. ¹²Age fiyauf are, lo are fateul, itāfiya are fateul, madur fen, biya. ¹³Age fouf are, ereb biya anim aya bun laa ousin de? Sā bagai! Anī ere, mosor are mosor ya anī yaorouf nigin,

^o 7:7 Eksodas 20:17; Diuteronomi 5:21

mosorem ereb biya bunem aya bun laa irousin, are mosor itāfiya bunem mosor bagai wō youf nigin age fen.

¹⁴Ada keleī, lo are Negur bun tamal, anī ere, aya bouwa buru nē, mosor nē ferfer gen na nē sur fiyan. ¹⁵Ereb aya age afef, are aya keleī sā. Ere nigin, ereb aya age fiya nigin orouf, are aya to age afedig, anī ere, ereb aya to orouf anī, aya age afedig. ¹⁶Ereb aya age fiya nigin to orouf anī, aya age afouf are, aya lo are biya auf anī ifelnadaf. ¹⁷Anī nigin, aya yug anī to age afef, anī ere, mosor aya nameun ibodok anim age fef. ¹⁸Aya keleī, ereb biya taka, aya nameun, are mosor nē bouwau enei bun to ibodok. Ere nigin, aya ereb biya age fiya nigin orouf, anī ere, aya age fiya kisi feleya sā. ¹⁹Ere nigin, ereb aya age afef, are ereb biya age fiya nigin orouf anī sā, anī ere, ereb sane aya age fiya nigin to orouf anī, aya faimud age afedig. ²⁰Aya ereb to orouf anī age afouf are, ayam anī to age afef, anī ere, mosor aya nameun ibodok anim age fef.

²¹Anī nigin, aya tobonunā eig fiya kabī yale mog, ailef: Sain aya biya age afou fenē di, sane anī aya ado ibodōdig. ²²Ere nigin, aya nameun Negur nē lo nigin wau kulī yedig, ²³anī ere, aya lo taka anī bouwau tunī bun kabī yale mog, ailef, are neu kisi biya nē lo ado kusī de fen, aya, mosor, bouwau tunī bun kabī yalef anī nē lo nē kalabus tamo inenadig. ²⁴O aya malaulon bagai! Aim anī aya laa nē bouwau enei bun tamal yalelnauf? ²⁵Neda Odug Jesus Kristus age fen bunem Negur ada yalelnadan nigin ī de tafiyēf!

Age fiyauf are, aya yug neu kisi bun are, Negur nē lo nē ferfer, anī ere, aya mosor nē bouwau enei bun, mosor nē lo nē ferfer.

Awa Uur Bunem Mata Ibodōya

8 ¹Anī nigin, idi Kristus Jesus bun dibodok anidi bun, mosor dinon nigin bou yūya taka gama to ibodok, ²ere nigin, Kristus Jesus bunem, mata nē Awa Uur nē lo anim, mosor ado laa nē lo bun tamal yalelnan. ³Mosor nē bouwa felu reya nigin, lo anim age fiya nigin kisi feleya sā anī Negur age fen, are ī yogon Naal, mosor tamo nē bouwa gen bun, mosor yaleleya nē sesewi fiya ibodōf nigin sur fiyen anī bunem, Negur ī, mosor, mosor tamo nē bouwa bun ibodok anī nē megeir yukesin, ⁴are madur bagai wō youf nigin lo irok anī, bouwa nē oroya tator ken, Awa Uur nē oroya bun tabodōdig ada bun, kisi falauf nigin, Negur ī age fen.

⁵Idi bouwa nē oroya bun dibodōdig anidi, dogo neid kisi are, ereb mosor nē bouwa orof anī bun yenēdig, anī ere, idi Awa Uur nē oroya bun dibodōdig anidi, dogo neid kisi are, ereb Awa Uur orof anī bun yenēdig. ⁶Kisi mosor nē bouwa bun yenēdig, are laa nē, anī ere, kisi Awa Uur bun yenēdig, are mata nē ado wau inosiya nē, ⁷ere nigin, kisi mosor nē bouwa bun inodig, are Negur kiwai ifenēdig, are Negur nē lo farumen

to ibodōdig, i age fiya nigineg kisi feleya sã. ⁸Idi mosor nē bouwa bun dibodōdig anidi, Negur wau al fiya ifenēya kisi feleya sã.

⁹Anī ere, Negur nē Awa Uur ā namein ibodōf are, ā mosor nē bouwam to ulum iroukeneif, anī ere, ā Awa Uurem ulum iroukeneif. Anī ere, taka i Kristus nē Awa Uur sãf are, i Kristus nē sã. ¹⁰Anī ere, Kristus ā namein ibodōf are, āgenei bouweī mosor nigin laa foufeg, āgenei uur madur bagai nigin mata ibodok. ¹¹I Jesus tamo gare den bun tamal, kel turī fiyen anī nē Awa Uur, ā namein ibodōf are, i Kristus tamo gare den bun tamal, kel turī fiyen, yogon Awa Uur ā namein ibodok anī bunem, āgenei bura leya nē bouweī matag ifeneif.

¹²Anī nigin, turau tar, ada wareg ado, are ada mosor nē bouwa to dō tafouf, bouwa nē oroya bun to tabodōf. ¹³Ā bouwa nē oroya bun ubodōgouf are, ā gare gouf, anī ere, Awa Uur bunem ā bouwa nē tobonunā anī ukesigouf are, ā mata ubodōgouf, ¹⁴ere nigin, idi Negur nē Awa Uurem uyū iroukenēdif are, idi Negur nē gere tar. ¹⁵Ā kumiya nē ferfer ineneiya nē uur to walegen, anī ere, ā Negur nē gere tar ineneiya nē Awa Uur walegen. Anī nigin, i bunem ada taweig fen, “Aba,^p Dei” taudig. ¹⁶Awa Uur yogo, ada neda uur bun kurō falaisi, ada Negur nē gere tar yedig. ¹⁷Ada in gere tar ouf are, ada ereb el fiya biya Negur ifanadauf nigin promis od iron anī talouf. Ada Kristus geid weim yogon fula fiya medeiyag talouf nigin ada momoi bagai i geid weim yogon darau talouf are, ada Kristus geid weim ereb el fiya biya Negur ifanadauf nigin promis od iron anī talouf.

Fula Fiya Medeīya Dumen Nē

¹⁸Aya kisi afef, fula fiya medeīya ada bun yaorouf, are ada neda darau gama talef anī wal fiya bagai. ¹⁹Ereb ereb ganan Negur inodin are, Negur yogo gere tar yaor fediyouf nigin, fatuk bagai tari difedig. ²⁰Ere nigin, ereb ereb ganan Negur inodin are, Negur uruwa idi yogon oroya dō difouf nigin kisi fen anī idi to dō difedig, are dogo neid oroya bunem sã, anī ere, i agef inodin anī nē oroya bunem. Anī ere, waud iseya ado, ²¹are ereb ereb ganan Negur inodin, idig dogo bura leya nē kafī fiya bun tamal yalalneid fen, Negur nē gere tar neid fula fiya medeīya nē karika ibodōya bun gurif iroulediyouf.

²²Ada keleī, ereb ereb ganan Negur inodin, idi kesu gō fiya nē darau bun gen, gariya bunem osi def disi, gama sain enei bun bargaig, age difef. ²³Anī dogol sã, anī ere, ada, Awa Uur, are dumen fula fiya medeīya ada talouf nē faat uyulil yūya anī talen, ada dugeg, Negur ada bouwada kel geif fen, ada yogon gere tar bagai ya anī yaor fe kurō falaisiyouf nigin, fatuk bagai tari tafe fen, namedan osi taudig. ²⁴Ada kel gei fadan sain

^p 8:15 Anī nē gariya, Aram od bun ‘Dei.’

bun, ada wauda iseya enei talen. Anī ere, wau iseya malam ileyā are, wau iseya bagai sā. Aim anī, ereb ī mogo ilef nigin wau isauf? ²⁵Anī ere, ada ereb ada fau ileyā sā nigin wauda isauf are, ada totol tano fen, tari tafouf.

²⁶Age fiya gen, Awa Uur ī neda felu reya bun isennadadig. Ada ereb nigin kosē tauf anī ada keleī sā, anī ere, Awa Uur yogo od faded fiya kisi feleya sā anī, osi ye fen, ada nigin kosē yedig. ²⁷Age fe di, Negur ada wauda fele fedig, ī Awa Uur nē kisi keleī, ere nigin, Awa Uur ī tamo kayau fateul nigin Negur nē oroya kilei kosē yedig.

Ada Kusī Wal Difen Anidi Wal Fediya

²⁸Ada keleī, ereb ereb ganān bun, Negur yogo nigin waud laa fedig anidi neid biya fiya nigin Negur kabī yaledig, idi yogon oroya kilei iweignēdin anidi. ²⁹Idi Negurem mogo keleīn anidi, Negur idi yogo Naal gen wowā douf nigineg mogo igirnēdin, are yogon Naal, tura tar musei atun, kesu matu wō youf nigin age fen. ³⁰Agef fen, idi Negur igirnēdin anidig, ī iweignēdin, idi Negur iweignēdin anidig, ī madur bagai fiyēdin, idi Negur madur bagai fiyēdin anidig, ī fula fiya medeīya ifenēdin.

³¹Age fiyauf are, ada enei nigin ere tauf? Negur ī nedauf are, aim anī ada daū fadaya kisi feleya? ³²Ī yogo Naal bagai nigin to katū ye fen, ada ganān nigin yogo Naal itornen anī, naig fe di, ī yogo Naal ado ereb ereb ganāneg, ege kilē to ifanadauf? ³³Aim anī, Negur igirnēdin anidi kot bun inenēdiyof? Negur yogo idi madur bagai fiyēdidig. ³⁴Aim anī, idi mosor dinon ye fen, idi bouweid bun od yūf? Kristus Jesus ī mogo laa fen, agef feneg, ī kel turī fe di, matan, ī Negur ima biyalē ibod ken, ada nigineg kosē yedig. ³⁵Aim anī, ada Kristus nē wau laa fiya bun tamal fara fadauf? Kafī fiya, morō, darau, naū, gemū, waila be, dimigem age fof de? ³⁶Are Negur nē Itotoya bun ibodok kilei,

“Ō nigin amā naa tekelei adok laa gurug mafef;
amā sipsip didenkesiya nigin age fiya gen dileman.”^q

³⁷Anī ere, enei ganān bun, ada, ī ada nigin wau laa fen bunem, ada kusī wal difen anidi wal fediya tabodok. ³⁸Aya momoi auf, laa, mata, engel, kaa sesen, ereb gama nē, ereb dumen nē, ereb megeir taka, ³⁹ilun, kuren bagai be, ereb ereb ganān inodin bun ereb takam, Negur nē wau laa fiya, neda Odug Kristus Jesus bun ibodok anī bun tamal, ada fara fadaya nigin kisi feleya sā.

Negur Yogo Bagai Igin

9 ¹Aya Kristus bun momoi orok, aya idegēya sā, neu kisi es fiya wau bun ibodok, Awa Uur Fateul bunem, aya bun anī megeir fef, ²are aya

^q 8:36 Sam 44:22

fatuk bagai wau gudūf fen, aya faimud wau bun morō ado. ³Ere nigin, aya, neu turau tar, neu ibor anidi nigin, aya yug isisna fen, Kristus bun tamal yalelnauf anīg, aya orouf. ⁴Idi Israel tamo kayau. Negur nē gere tar ya anī dogo neid, Negur nē fula fiya medeīya anī, idi bun yaor fen, Negur ado bar itenēya, lo yaleya, tempel bun Negur yana yaleseya ado, ereb Negur age afouf ye fen igirin, are dogo neid. ⁵Tubuid tar Abraham, Isak, Jakop are dogo neid, idi neid ibor anī isi isi Kristus wō yen, Kristus ī Negur, ganan ī farumen dibodok, faimud ī yana talesauf! Momoi.

⁶Are Negur nē od irofosiya gen sã. Ere nigin, Israel ibor bun wō den anī, ganan Israel sã. ⁷Idi Abraham nē ibor nē tubu tar ba, anī ere, ganan Abraham nē gere tar bagai sã. Age fiya ban, “Isak bunem, ogon ibor tar douf.”^r ⁸Are, tamo nē tobonunã nē naud bunem Abraham nē gere tar wowã den anidi ganan, Negur nē gere tar sã, anī ere, promis nē gere tar idi, Abraham nē ibor tar youf. ⁹Negur nē promis od anī eig fiya, “Yogon sain bun bagai, aya kelauf, Sara kesu adouf.”^s

¹⁰Anī dogol sã, anī ere, Rebeka nē gere tar tama tekelei ado, are tubuda Isak. ¹¹Anī ere, kesu uru fau gō fiya sã bun, ereb biya be sane be age fiya sã mog, Negur nē oroya anī, kabī bunem sã, iweignēdif ī bunem, yogon igiriya bun ifarauf nigin, ¹²ī Rebeka irokenen, “Matu anī, ibuye nē aruna yaleyēf.”^t ¹³Are Negur nē Itotoya bun ibodok kilei, “Aya Jakop nigin wau laa fen, anī ere, Esau to oroun.”^u

¹⁴Age fiyauf are, ada ere tauf? Negur madur sã de? Sã bagai! ¹⁵Ere nigin, Negur Moses irokenen,

“Aya aib nigin wau yuk anī bun, wau yūya afenēf,
aya aib nigin wau irok, ī nigin wau yenēf.”^v

¹⁶Anī nigin, are, tamo nē oroya be kabī totol yaleya bunem sã, Negur nē wau yūya bunem. ¹⁷Negur nē Itotoya bun, Isip nē king Farao nigin eig ye irok, “Aya ō enei nigin bagai king anenon, are aya ō bun neu megeir yaor afe di, teneub ganan bun, neu yanau kurō difalaisiyouf nigin age afen.”^w

¹⁸Anī nigin, Negur aib ī wau yūya ifenēya nigin orof bun, ī wau yūya ifenēdig, agef fen, ī aib nē wau katī feleya nigin orof bun, ī katī feledig.

¹⁹Ā takam aya irokanauf, “Age fiyauf are, ere nigin Negur fau ada bouwada bun od yuk? Aim anī yogon oroya katī felef?” ²⁰Anī ere, tamo ō ai anī Negur od solo urokenēf? “Ereb kare fen anim ī kare fen anī, ‘Ere nigin eig wo unoyan?’ fiyēf de?”^x ²¹Mis inoya tamo ī mafer de tekelei anim, mis uru, taka kabī biya ifenēya nē, taka kabī sane ifenēya nē, yogon oroyam inoya kisi feleya sã de?

²²Negur ī yogon didi anī yaor fe di, yogon megeir anī tamo kayau keleī youf nigin wau iro ken, yogon didi idi bun ile, daū feidlauf anidi nigin

^r 9:7 Genesis 21:12 ^s 9:9 Genesis 18:10, 14 ^t 9:12 Genesis 25:23 ^u 9:13 Malakai 1:2, 3

^v 9:15 Eksodas 33:19 ^w 9:17 Eksodas 9:16 ^x 9:20 Asaia 29:16; 45:9

molol bunem loloum fedī di, sain meluk ibodon ouf are, ada ere tauf?
²³Negur ī idi fula fiya medeīya dalouf nigin dodok fe fen, yogon wau
 yūya ifenēdiyof anidi bun, yogon fula fiya medeīya barikā anī yaor fiya
 nigineg wau iron ouf are, ada ere tauf? ²⁴Ada buneg Negur iweignadan,
 Juda temeleid dogol sã, haiden buneg. ²⁵Are Hosia nē itotoya buneg
 Negur wogō yef kilei,

“Aya idi neu tamo kayau sã anidi, neu tamo kayau auf,
 age afe fen, aya neu oboiyou sã anī, neu oboiyou auf.”^y

²⁶takag,

“Negur ‘Ã neu tamo kayau sã’ yen nē modou anī bun,
 idi anī ‘Negur mata ibodōya nē gere tar’ youf.”^z

²⁷Asaia Israel nigin iweig iron,

“Israel tamo kayau maaī ubun mumul gen musei bagai,
 anī ere, musei sã dogol kel gei fediyof.

²⁸Ere nigin, Odug ī teneub bun,

yogon tamo kayau es fediyof nē od ganan kaisã bagai dōf agef
 kisi falauf.”^a

²⁹Are Asaia mogo iron kilei,

“Odug saa ilun nē kusī tamo guri feid uyu iroudig anī,
 neda ibor nē tubu tar tunī to itornēdim are,
 ada Sodom gen wō taum,
 ada Gomora gen tabodom.”^b

Israel Tamo Kayau Momoiya Sã

³⁰Anī nigin, ada ere tauf? Haiden idi madur bagai anī to dimiren anidi,
 momoiya bunem madur bagai anī dalen. ³¹Anī ere, Israel idi madur bagai
 nē lo dō difen, idi madur bagai anī yaleya sã. ³²Ere nigin yaleya sã? Idi
 Negur nigin momoiya bunem dō fiya sã, anī ere, lo dō fiya bunem, Negur
 mala bun madur bagai dalouf nigin age difen nigin. Idi ye tū fiya nē
 meein anim yeid tū fen. ³³Are Negur nē Itotoya bun ibodok kilei,

“Lo weleg, aya Saion oun tamo yeid tū fiya nigin meein taka,
 idi kubū douf nigin sa tuwa taka anof,

age afe di, taka ī, ī nigin momoi youf, ī mama to bagai yalouf.”^c

10 ¹Turau tar, aya Negur ī Israel kel gei fediyof nigin wau iro
 ken, Negur bun kosē audig. ²Aya idi nigin kurō afeis eig auf, idi
 Negur nigin kisi total dinodig, anī ere, idi neid kisi total are kelei bunem
 sã. ³Ere nigin, idi madur bagai Negur bunem isif anī to kelei ken, dogo
 neid madur bagai anī dalouf nigin dimiren, age dife fen, idi, Negur tamo
 kayau yogon mala bun madur bagai inenēdiya nē naab anī ditoron.

^y 9:25 Hosia 2:23 ^z 9:26 Hosia 1:10 ^a 9:28 Asaia 10:22, 23 ^b 9:29 Asaia 1:9

^c 9:33 Asaia 8:14; 28:16

4 Kristus ī, idi momoi def ganan madur bagai wowā douf nigin, lo nē idikeleya wō yen.

5 Moses ī madur bagai lo ganan dō fiya bunem isif nigin eig ye itoton, “Tamo ī lo enei dō fef, ī anī bunem mata ibodōf.”^d 6 Anī ere, madur bagai momoiya bunem isif anī eig ye irok, “Ō waū bun to eig wo urōf, ‘Aim anī saa ilun isilauf?’^e ” (are, Kristus irou isiyouf nigin) 7 “oo ‘Aim anī teneub kur bagai isilauf?’^f ” (are, tamo gare den bun tamal Kristus irou isauf nigin). 8 Anī ere, ī ere ye irok? “Od anī ō wagen ibodok, are ogon sigor bun, ogon waū bun ibodok,”^g are momoiya nē od amā wogō mauidig anī. 9 Are ō ogon sigorom, “Jesus ī Odug,” wo fen, ō waū bun, Negur ī Jesus tamo gare den bun tamal kel turī fiyen anī, momoi wouf are, ō kel yaleyōf. 10 Are, taka ī wau bun momoi ye di, Negur ī madur bagai yef, age fe di, taka ī sigorom momoi auf ye di, Negurem ī kel yalouf. 11 Are Negur nē Itotoya bun ibodok kilei, “Taka ī, ī nigin momoi youf, ī mama to bagai yalouf.”^h 12 Juda ado haiden bun fire fire sã, Odug de tekelei anī ganan nē Odug, ī idi diweignek ganan bun el fiya fatuk bagai ifenēdidig, 13 are Negur nē Itotoya bun ibodok kilei, “Idi Odug nē yana dale diweignek ganan, Negurem kel gei fediyouf.”ⁱ

14 Age fiyauf are, naig fe di, idi ī nigin to momoi den ani diweignēf? Naig de fen, idi to karī den anī nigin momoi douf? Taka nem to irokenēdiyof are, naig de fen, idi karī douf? 15 Idi to sur fediyof are, idi naig de fen, od wogō douf? Are Negur nē Itotoya bun ibodok kilei, “Idi biya od diroulef anidi, yeid gai meli bagai!”^j

16 Anī ere, Israel tunī biya od anī to dalen. Idi age difen nigin, Asaia eig ye iron, “Odug, aim anī nemā od nigin momoi yen?”^k 17 Anī nigin, momoiya anī biya od karīya bunem isidig, biya od karīya are Kristus nē od bunem isidig. 18 Anī ere, aya to afef; Idi to karī dedig de? Momoi, idi karī den, are Negur nē Itotoya bun ibodok kilei,

“Neu arū tamo neid aiteid, teneub ganan bun iyokelen,
dogo neid od teneub idikeleya bun ilen.”^l

19 Baban aya to afef: Israel idi to kelein de? Uruwa bun, Negur Moses bunem iron,

“Aya tamo kayau yeneid sã idi bun age afe di, idi nigin ā kiyeī
unogouf.

Aya tamo kayau keleī sã idi bun age afe di, idi nigin ā nameī
saneuf.”^m

20 Takag, Asaia kukīya sã eig ye iron,

“Idi aya to dimirnan, aya dileyauf.

^d 10:5 Levitikas 18:5 ^e 10:6 Diuteronomi 30:12 ^f 10:7 Diuteronomi 30:13

^g 10:8 Diuteronomi 30:14 ^h 10:11 Asaia 28:16 ⁱ 10:13 Joel 2:32 ^j 10:15 Asaia 52:7

^k 10:16 Asaia 53:1 ^l 10:18 Sam 19:4 ^m 10:19 Diuteronomi 32:21

Idi aya nigin to fiya san anidi bun, aya yug yaor afouf.”ⁿ

²¹Anī ere, Israel nigin ī eig ye iron,

“Naa tekelei adok, aya tamo kayau dō fiya sã, fe temeleid bun imau dō au fen, tari afedif abodon.”^o

Israel Idi Atun Musei Sã Dogol

11 ¹Age fiyauf are, aya to afef: Negur ī yogon tamo kayau aulel fedin de? Sã bagai! Aya yug Israel temelou, Abraham nē ibor, Benjamin nē gī bun temelou. ²Negur ī, yogon tamo kayau, ī mogo gariya bunem kelei ken igirnēdin anidi to aulel fedin. Ereb Negur nē Itotoya bun Eliya nigin irok, are ī Negur ado, Israel idi nigin bou yūya od wogō den anī, ā to keleī de? ³“Odug, idi mogo ogon profet didenkeis fen, ogon alta narī difedin. Aya mugu dogol ditorna fen, idi aya dinakesiyouf nigin age difef.”^p ⁴Age ye di, Negur ere od solof irokenen? “Aya, aya yug nigin sewen tausen tamo idi idegēya waitou Bal bun to iboreid bobou difen anidi, foi afen.”^q ⁵Age fiya gen, sain enei buneg, Negur wau ifenēya bunem musei sã igirnēdin anidi fau dibodok. ⁶Igiriya anī, Negur nē wau ifenēya bunem isin, are tamo nē kabī bunem sã. Igiriya anī tamo nē kabī bunem isin ouf are, Negur nē wau ifenēya anī, wau ifenēya sa ken, mala ifenēya yenem.

⁷Anī nigin, ada ere tauf? Ereb Israel idi kabī total dale fen, dimiren anī, idi to dalen, anī ere, Israel tunī musei sã Negur igirnēdin anidim dogol dalen. Israel tunī ganan Negur waud ifofakelen. ⁸Are Negur nē Itotoya bun ibodok kilei,

“Negur, idi kisi kurā fiya sã nē uur,
meleid to dilouf nē ado,
wedereid to karī douf nē anī ifenēdin,
anī bunem isi gama naa enei bun.”^r

⁹Takag, Dawid eig ye iron,

“Neu kiwai tar, idi neid sifa nē tebol bun, saaf dokon waud kulī yen sain bun,
idi suk bun gei difediyouf, idi kor bun gei difediyouf, idi neid el fiyam, dogo yeid tū difouf nigin ado, mala solo fiya nē darau,
idi bun wō youf nigin aya orouf.

¹⁰Dogo neid meleid gugum kele fen, to dilouf, dogo neid bagiyeid gai gai nigin fe fesilauf anī orouf.”^s

Aa Taka Nē Were Aa Taka Bun Inoya

¹¹Age fiyauf are, aya to afef: Idi yeid tū fe di, kubū de fen, baban fāya kisi feleya sã de? Sã bagai! Anī fotokar, idi neid mosor nigin, kel gei fiya

ⁿ 10:20 Asaia 65:1 ^o 10:21 Asaia 65:2 ^p 11:3 1 King 19:10, 14 ^q 11:4 1 King 19:18

^r 11:8 Diuteronomi 29:4; Asaia 29:10 ^s 11:10 Sam 69:22, 23

are haiden bun isin, are Israel idi kiyeĩ dinouf nigin age fen. ¹²Anĩ ere, idi neid mosor nigin tenebur tamo kayau bun el fiya kisi feleya bagai wō ye fen, idi neid kũ fenēya nigin haiden bun el fiya kisi feleya bagai wō youf are, idi neid gire fiya anim naig fiya el fiya kisi feleya bagai irousiyouf!

¹³Aya ā haiden bun wogō auf. Aya haiden bun aposel nigin, aya neu kabĩ nigin fatuk bagai yanau alesef, ¹⁴are aya neu Israel tamo kayau turĩ afeid, idi kiyeĩ dinouf bun, idi tunĩ kel gei afouf nigin age afef. ¹⁵Negur idi aulel fedin bunem, tenebur tamo kayau idi Negur geid komo fiya dalen ouf are, sain Negur idi yalediyouf bun, ere anĩ wō youf? Are idi tamo kayau ganan gare den bun tamal mata kel fā den gen ouf. ¹⁶Wit uyulil faat yun anĩ bunem sesewi fiya nē bret dinof, anĩ nē masak fateul ouf are, bret gananeg fateul. Warumutei anĩ fateul ouf are, were gananeg fateul.

¹⁷Were tunĩ kokour fele fen, ō oliv aa kuĩ nē were, oliv aa bun bagu yō di, oliv aa nē warumutei bun saaf tekelei waledig, ¹⁸anĩ nigin, Israel idi bun, ō haiden yanā to wales. Ō yanā walesauf are, enei kisi wo: Ō warumutei to usennek, anĩ ere, warumutei anĩ ō isennok. ¹⁹Anĩ ere, ō eig wo urōf, “Aya aa anĩ bun bagu fiyauf nigin were kokour feledin.” ²⁰Are momoi. Ani ere, idi momoiya sã nigin kokour feledin, age fe di, ō momoiya bunem ufaref. Ō yanā to wales, anĩ ere, ō kumĩ wouf. ²¹Ere nigin, Negur ĩ Israel idi oliv aa nē were bagai yalelnēdiyof nigin to katũ yen ouf are, ĩ ō nigineg to katũ youf.

²²Anĩ nigin, Negur nē molol ado wau itenēya nigin kisi gouf, ĩ idi kubũ den anidi bun wau itenen, anĩ ere, ā in molol bun toku ubodōgouf are, ĩ ā bun molol ibodōf. Anĩ ere, ā in molol bun to ubodōgouf are, āg kokour yeikalauf. ²³Israel idi momoiya sã bun toku to dibodōf are, idi baban aa oliv bun bagu fediyouf, ere nigin, Negur ĩ baban idi bagu fediya nigin kisi feleya. ²⁴Ō ogon gariya oliv aa kuĩ bagai bun tamal kokour fele fen, ogon gariya sã oliv aa bagai kulatun fedig anĩ bun bagu yon ouf are, oliv aa bagai nē were eneidi, naig fiya karika bagai dogo neid oliv aa bagai bun bagu fediyouf!

Israel Ganan Kel Gei Fediyouf

²⁵Turau tar, aya waa enei ā to keleĩ youf nigin to orouf, are ā aug nigin keleĩ biya ado to gouf nigin age afef. Waa are, Negurem Israel tunĩ waud ifofakelen, anĩ bunem idi dibodok disi mog, haiden idi Negurem igirnēdin anidi ganan Negur wagen disiyouf sain anĩ bun. ²⁶Age dife di, Israel ganan kel gei fediyouf, are Negur nē Itotoya bun ibodok kilei,

“Kel yaleya tamo Saion bun tamal isiyouf,

ĩ Jakop bun tamal Negur nē od dō fiya sã nē tobonunã anĩ yalelauf.

27 Aya, idi geid bar itenēya nē enei atenēf,
anī bunem aya dogo neid mosor alelauf.”^t

28 Biya od nigin, idi ā nigin kiwai, anī ere, Negur nē igirīya nigin, idi tubuid tar nigin, Negur idi nigin wau laa fedig, 29 ere nigin, Negur nē ege luwa ado yogon igirīya anī falei fiya kisi feleya sā. 30 Ā uruwa bun Negur dō fiya sā, anī ere, ā gama, Israel Negur dō fiya sā nigin, Negur nē wau yūya walegen. 31 Age fiya gen, idig gama Negur dō fiya sā, are Negur nē wau yūya ā ifenein anī bunem, idig gama Negur nē wau yūya dalouf nigin age fen. 32 Age fiya nigin, Negur ī tamo ganan, dō fiya sā nē kafī fiya bun inenēdin, are ī idi ganan wau yūya ifenēdiyof nigin age fen.

Negur Yana Yaleseya Nē Od

33 O Negur nē kisi biya ado keleī biya, are kisi feleya bagai ilon bagai isilef.

Yogon es fiya anī imir ken, keleīya kisi feleya sā,
yogon delē iyōdig anī dir feleya kisi feleya sā.

34 Are Negur nē Itotoya eig ye irok, “Aim anī Odug nē kisi kelein?
Aim anī ī ulum iroukenen?”^u

35 “Aim anī Negur ifenen nigin
Negur ī aba kel ifenēf?”^v

36 Ada keleī, od enei are momoi, ere nigin, ereb ereb ganan ī bun tamal isif, ereb ereb ganan ī bunem ibodok, ereb ereb ganan ī bun ilef.

Ī bun fula fiya medeīya faimud ibodōf! Momoi.

Mata Ibodōya Nē Sesewi Fiya

12 1 Anī nigin, turau tar, aya, ā, Negur nē wau yūya ada ifanadan bunem totol bagai arokeneik, āgenei bouweī, mata ibodōya nē sesewi fiya, fateul ado Negur wau kulīya nē anī gen Negur wenēgouf. Enei anī, āgenei uurem Negur yana yaleseya. 2 Tenebur enei nē oroya baban to dōg, anī ere, Negur āgenei kisi falei fe mata inoyē di, āgenei kisi mata anī dō gouf, anī bunem, ā Negur nē oroya, are yogon biya nē, kulīya nē ado, kisi feleya nē oroya anī keleī youf.

3 Negur nē wau ifenēya bunem, aposel kabī yaleya nē yana aya ifanan nigin, aya ā ganan arokeneik: Taka ī yogo nigin kisi fouf anī to wal fe fen, kisi fouf, anī ere, momoiya Negur ifenen anī kilei, es fiya biya bun yogo nigin kisi fouf. 4 Ada bouwada tekelei bun fara fiya musei ado, anī ere, fara fiya ganan bun kabī tekelei sā, 5 age fiya gen, ada fara fiya musei, anī ere, Kristus bun, bouwada tekelei, fara fiya mugu mugu tunī ganan geid bagu fedif. 6 Negur wau ifenēya ada ifanadan kilei, ada Negur nē igirīya

^t 11:27 Asaia 59:20, 21; 27:9; Jeremaia 31:33, 34 ^u 11:34 Asaia 40:13 ^v 11:35 Job 41:11

ege luwa fire fire ado. Tamo ĩ profet od wogōya nē igirīya ege luwa adouf, utornēg len, ĩ yogon momoiya kilei wogō youf. 7 ĩ aruna yaleya nē igirīya ege luwa adouf, utornēg len, ĩ aruna yalouf. ĩ ifelnēya nē igirīya ege luwa adouf, utornēg len, ĩ ifelnēya kabī yalouf. 8 ĩ wau yaleseya nē igirīya ege luwa adouf, utornēg len, ĩ taka nē wau yalesauf. ĩ tunī lau fiya isennēya nē igirīya ege luwa adouf, utornēg len, ĩ wau sã ifenēdiyof. ĩ uyu irouya nē igirīya ege luwa adouf, utornēg len, ĩ fō fiya sã uyu irouya kabī yalouf. ĩ wau yūya ifelnēya nē igirīya ege luwa adouf, utornēg len, ĩ wau kulīya ado age fof.

Wau Laa Fiya

9 Wau laa fiya are mala yaleya sã. Ereb sane anī seseg fen, ereb biya anī kafī weleg. 10 Ā abob bun tureī tar bagai nigin gen, wauī laa fiya bun wauī wenēgouf. Ā atun abob yana ketem ilun walesagouf. 11 Ā to fō yei ken, kabī total waleg. Ā genei uur nē total bunem, Odug aruna walogouf. 12 Wau iseya bun wauī kulī youf, morō bun megeir ufaragouf, toku kosē gouf. 13 Negur nē tamo kayau lau difef anidi wenēdigouf. Tamo urug waledigouf.

14 Idi ā darau difeneik anidi el fiya wenēdigouf, el fiya wenēdig fen, to usisnēdigouf. 15 Idi waud kulī yef geid kulī gouf, idi inā dalef geid inā walogouf. 16 Ā abob nigin wauī tekelei yenēf. Ā yeneī to walesagouf, anī ere, ā tenebur difaref geid nigal yūya nigin ago gouf. Ā aug nigin keleī biya ado to gouf.

17 Ā aib taka sane age yeik anī, aba sane to wiyēgouf. Tamo ganan meleid bun ereb madur age fiya nigin karī walagouf. 18 Ā kisi feleyauf are, ganan geid wau inosiya bun ubodōgouf. 19 Neu oboiyof tar, ā aug mala solo to wenēdigouf, anī ere, Negur nē didi nigin modoū unogouf, ere nigin, Negur nē Itotoya bun eig ya ibodok, “Odug irok, mala solo ifenēya are neu. Ayam mala solo afenēf.”^w 20 Age fiya ban, Negur nē Itotoya bun eig ya ibodok,

“Ogon kiwai naū fof are, saaf wenē yāf,
ĩ naan ail fof are, naan wenē yāf.

Anī agouf bun, ĩ yogon ereb sane age fen nigin mama sane falauf.”^x
21 Ā sane anim to wal yeif, anī ere, āgem biya bunem sane anī wal gouf.

Gawaman Farumen Ibodōya

13 1 Tamo kayau ganan gawaman farumedin dibodōf, ere nigin, gawaman Negurem to inodin anī taka to ibodok. Gawaman gama dibodok are Negur yogo inodin. 2 Anī nigin, taka ĩ gawaman kiwai ifenek, ĩ ereb Negurem inon anī kiwai ifenek. Idi anī age difef, idi es fiya dogo

^w 12:19 Diuteronomi 32:35 ^x 12:20 Proveb 25:21, 22

bouweid bun dinouf. ³Ere nigin, uyu irouya tamo, idi biya age difef anidi kumī to difiyēdidig, anī ere, idi sane age difef anidi kumī difiyēdidig. Uyu irouya ī ō to kumī ifonōf anī, ō oroyok de? Agouf are, ereb tobonunā biya anī ago wo di, ī ō yanā yalesauf. ⁴Ere nigin, ī ogon biya fiya nigin Negur nē kabī tamo inenen. Anī ere, sane ago wouf, ō kumī wouf, ere nigin, ī dimig ege to irouf. Ī Negur nē kabī tamo, ī mala ifenēya tamo, idi sane age difef anidi bun Negur nē didi irou isif. ⁵Anī nigin, ā gawaman farumen bagai ubodōgouf, are darau kumīya bunem dogol sā, Negur mala bun ada biya be sane es fiya nē kisi nigineg ago gouf. ⁶Anī nigin, ā takiseg unogedig, ere nigin, gawaman nē kabī tamo are Negur nē kabī tamo, idi dogo neid sain ganan gawaman kabī nigin difenēdig. ⁷Ā ereb ganan ifenēya nigin yenek are wenēgouf, ā takis ifenēya nigin ouf, takis unogouf, ā safina yaleya nē takis ifenēya nigin ouf, safina yaleya nē takis unogouf, ā anini fiyēya nigin ouf, anini wiyēgouf, ā seli yabiya nigin ouf, seli wabigouf.

Abob Nigin Wauī Laaf, Naa Mogo Dodolef

⁸Wareg taka to utorōge di, ibodōf, abob nigin wauī laa fiya nē wareg dogol ā atun ibodōf, ere nigin, taka ī ne tā nigin wau laa fef, ī lo dōf kisi felef. ⁹Ītāfiya eig ye irok, “Seseirā to uno,” “Tamo to ukeis,” “Bē to ule,” “Taka nē safina to malā ile orouf,”^y Ītāfiya eneidi ado ereb lo tunī ifaredif are, Ītāfiya tekelei eneim ganan irouf, “Ō ogo nigin wau laa fef gen, nē tā nigin ago wau laa fouf.”^z ¹⁰Wau laa fiya anim, ne tā bun sane to age fedig. Anī nigin, wau laa fiya are lo dōf kisi felef.

¹¹Anī nigin, sain enei nigin wedereī fokōf fen, enei ago gouf. Ā mulaī itorōya nē sain mogo isif, ere nigin, ada uruwa bun momoi taun bunem isi, gama ada neda kel gei fadaya nē sain anī melsak. ¹²Bō are mogo sa kalau fenē, naa mogo wō you fenē. Anī nigin, ada gugum nē tobonunā tator, yerin gadi tafel fen, lalan nē tobonunā biya anī dō tafouf. Age tafe fen, ada, kusī nigin kusī nē naki total difonūdig gen, tobonunā biya anī, ada bun ibodōf nigin age tafouf. ¹³Tamo kayau we feleyan lo difeid le di, tobonunā biya age difedig gen, ada tobonunā biya dō tafouf, bilāya ado naan yōya bun sā, noli tobonunā ado bouwa nē oroya nigin total sane wau fāya bun sā, kusī ado kiyeī buneg sā. ¹⁴Anī ere, Odug Jesus Kristus anī waleg, aug bun ufonūgouf, agog fen, bouwa nē oroya dō fiya nē kisi anī bun to ufaragouf.

Momoiya Felu Reya Ado Momoiya Totol

14 ¹Taka ī momoiya felu ref are waleg fen, yogon keleī ā geid tekelei sā nigin to monē wiyēgouf. ²Tamo taka in momoiya anim irō di, ī

^y 13:9a Eksodas 20:13-15, 17; Diuteronomi 5:17-19, 21 ^z 13:9b Levitikas 19:18

ereb ereb ganan yōya nigin age fedig, anī ere, tamo taka in momoiya felu reya, ī sako dogol yōdig. ³Tamo ereb ereb ganan yōdig anim, ne tā sako dogol yōdig to kono fiyēf, age fe di, tamo ereb ereb ganan to yōdig anim, tamo ereb ereb ganan yōdig bou bun od to yūf, ere nigin, Negur ī yalen. ⁴Ō ai anī taka nē kabī tamo es wof? Ī kubū be youf, ifar bēf, are yogon Odug bun ibodok. Anī nigin, ī ifarauf, ere nigin, Odug ī yogo, ī ifareya nigin age fiya kisi feleya.

⁵Tamo taka ī, naa taka anī naa ganan wal fiya gen iledig. Tamo taka naa ganan are de kilei kilei iledig. Idi mugu mugu dogo neid kisi bun anī nigin waud ditenēf. ⁶Taka ī naa taka anī odug gen ilef, Odug nigin ye fen, ī age fef. Age fiya gen, taka ī yaro muda yoko, Odug nigin ye fen, yoko, ere nigin, ī Negur de fiyek. Taka ī ereb ereb tunī yōya nigin itorok, ī Odug nigin ye fen, agef fen, Negur de fiyek. ⁷Ere nigin, ada takam yogo nigin mata to ibodok, ada takam yogo nigin to laa fef. ⁸Ada mata tabodok are, ada Odug nigin mata tabodok. Ada gare taur are, ada Odug nigin gare taur. Anī nigin, ada mata tabodok be, gare taur, ada Odug nē.

⁹Gariya enei nigin, Kristus laaf fen, mata kel fā yen, are ī tamo gare den ado tamo mata dibodok neid Odug ibodōf nigin age fen. ¹⁰Age fiyauf are, ō ere nigin ogon turā es wiyek? Ō ere nigin ogon turā kono wiyek? Ada ganan Negur nē es fiya nē sia wagen tafarauf. ¹¹Age fiya nigin, Negur nē Itotoya eig ya ibodok,

“Odug irok, aya momoi bagai mata abodok nigin,
iboreid ganan aya bun bobou difouf,
baleid ganan kurō difeis, Negur yana dalesauf.”^a

¹²Age fiya nigin, ada mugu mugu, ada dug nigin Negur kurō tafais tarokenēf.

¹³Anī nigin, ada abob es fiyēya tatorōf. Anī ban, ā tureī nē naab bun ereb naabura gudūf kenēya nē taka be, ye tūf kenēya nē taka to onogouf nigin lo walagauf. ¹⁴Odug Jesus kisi fokō fel kana di, aya momoi bagai kisi afef, are saaf, Negur mala bun amuyē ado taka to ibodok. Anī ere, taka ī saaf taka amuyē ado youf are, ī yogo bun saaf anī amuyē ado. ¹⁵Ereb ō woko anī bunem ogon turā ī wau morō wenēf are, ō wau laa fiya bunem to agof. Ereb ō woko anī bunem, turā Kristus ī nigin laa fen anī to daū wiyē. ¹⁶Anī nigin, ereb ā biya gef anī, tamo kayau idi to sane douf nigin ago gouf. ¹⁷Ere nigin, Negur nē tano are, saaf yōya ado naan yōya nē sā, anī ere, Awa Uur Fateul bun madur bagai, wau inosiya ado, kulīya nē. ¹⁸Taka ī naab enei bunem Kristus aruna yalef, ī Negur wau kulīya ifenē di, tamo dile fen, biya douf.

¹⁹Anī nigin, ada ereb maror inoya nigin ado abob yalesnēya nigin, kabī total talouf. ²⁰Saaf bunem Negur nē kabī to daū gouf. Saaf ganam amuyē

^a 14:11 Asaia 45:23

sā, anī ere, tamo ī saaf yōya bunem, ne tā, Negur nigin momoiya nē naab dōf mog ye isog yale di, kubū youf, are sane. ²¹ Ō, nē turā kubūya nigin yaro to wāf be, aai to wāf be, ereb takag to agouf, are biyauf.

²² Anī nigin, ereb ereb enei bun ogon momoiya naig be fe yenēf, are ō ogo ado Negur bun dogol ibodōf. Tamo ī, ereb ī momoi bagai kisi fen biya yef anī, age fef bun, ī yogo bou bun od to yuk are, Negur ī el fiyek. ²³ Anī ere, tamo ī kisi toguf fen, saaf yoko, ī yogo bou bun od yuk, ere nigin, yogon saaf yōya are momoiya bunem sā. Ereb ereb ganan momoiya bunem isiya sā, are mosor.

15 ¹ Ada momoiya total ado, idi momoiya total sā neid morō faali tafouf. Ada dug wauda al fouf nigin to age tafouf. ² Ada mugu mugu, neda tā tar, idi neid biya fiya nigin ado idi yalesnēdiyof nigin, wau al fiya tafenēdiyof. ³ Ere nigin, Kristus ī yogog yogo wau al fouf nigin to age fen, are Negur nē Itotoya eig ye irok kilei, “Idi ō kono diyon anidi neid kono fiya, aya bun isin.”^b ⁴ Ereb ereb ganan kulu ditoton are, ada ifelnadauf nigin ditoton, are morō bun feseya sā ifareya bunem ado wau yaleseya Negur nē Itotoya anī ifanadaf anī bunem, ada wauda iseya adouf nigin age difen.

⁵ Negur, morō bun feseya sā ifareya ado wau yaleseya ifeneidig ī, ā Kristus Jesus dōg mog, ā atun wau tekelei nē uur ifeneif nigin aya orouf, ⁶ anī bun, wauī tekelei ado sigoreī tekelei bunem, ā Negur, neda Odug Jesus Kristus nē Tama fula fiya medeīya wenēgouf.

⁷ Anī nigin, Negur yana fula fiya medeīya bun iselauf nigin, Kristus ā yaleyein gen, āg abob walogouf. ⁸ Aya ā arokeneik, Kristus ī, Juda neid kabī tamo wō yen, are Negur tubuda tar bun age afouf yen anī kilei bagai, Negur age fouf anī, megeir fe ifelnēdiyof nigin ado, ⁹ haiden idi Negur nē wau yūya nigin, Negur fula fiya medeīya difenēf nigin age fen, are Negur nē Itotoya bun ibodok kilei,

“Anī nigin, aya haiden atun ō yanā alesauf,
aya ō yanā bun seg alouf.”^c

¹⁰ Baban ī irok,

“O haiden ā, in tamo kayau geid wauī kulī ye.”^d

¹¹ Baban,

“Haiden ā ganan, Odug yana waleseg!

Tamo kayau ā ganan, ī yana waleseg fen, seg waleg!”^e

¹² Baban, Asaia iron,

“Jesi nē warumutei bun bali mata fokū youf,
ī wō ye fen, teneub ganan nē mudur ibodōf,
haiden idi ī nigin waud isauf.”^f

^b 15:3 Sam 69:9 ^c 15:9 2 Samuel 22:50; Sam 18:49 ^d 15:10 Diuteronomi 32:43

^e 15:11 Sam 117:1 ^f 15:12 Asaia 11:10

¹³Wau iseya nē Negur, ā Negur momoi wiyēg mog, wau kulīya ado wau inosiya ganan, ā namein fi fele di, ise isokosauf, anī bunem, ā bun Awa Uur Fateul nē megeir bunem wauī iseya gogū foug nigin aya orouf.

Pol, Haiden Atun Kabī Tamon

¹⁴Neu turau tar, aya yug momoi auf, ā aug tobonunā biya barikā, keleī barika ken, abob ifelnēya nigin kisi feleya bagai. ¹⁵Anī ere, wau ifenēya Negur aya ifanan anī nigin, aya ā gariya tunī baban wedereī fokō youf nigin total ado atokenein, ¹⁶wau ifenēya anī bunem, aya haiden bun Kristus Jesus nē kabī tamo wō au fen, pris gen Negur nē biya od wogō auf, are haiden idi, Negur mala bun sesewi fiya biya, Awa Uur Fateulem fateuledin, wowā douf nigin age afef.

¹⁷Anī nigin, aya Kristus Jesus bun, neu kabī Negur bun aledig nigin yanau alesef. ¹⁸Aya ereb taka to wogō au fen, ereb Kristus aya bunem age fen anī dogol wogō auf, are aya ereb aya wogō aun ado ereb aya age afen bunem, haiden idi uyu arou di, idi Negur sigor dō difef anī, wogō auf, ¹⁹are aya Awa Uur nē megeir bunem, uris ado memelik nē megeir bun age afen. Anī nigin, aya Jerusalem anenem gariya ano fen, tokō afel, Ilirikum provins ayo kele fen, Kristus nē biya od kisi feleya bagai yaor afen. ²⁰Aya, idi Kristus keleī sā anidi bun, an biya od wogō auf nigin, faimud kisi total aledig, are aya takam gariya inon anī bun, kabī to alouf nigin age afedig. ²¹Are Negur nē Itotoya bun ibodok kilei,

“Idi ī nigin to karī den are dilouf,
agef fen, idi to karī den are keleī youf.”^g

²²Aya biya od modoū age fedijan wogōya nigin sain musei aledig anim, aya ā gein isiya nigin sain musei naaburau gudū fedig.

Pol Rom Taun Ki Ileya Nigin Kisi Fen

²³Anī ere, gama aya kabī yaleya nigin, akor enei bun modoū taka sa ken, aya yar musei ā gein isiya nigin kisi total aledig nigin, ²⁴aya Spein alauf bun asi fen, ailiyeif nigin kisi afen. Aya ileya bunem ki ayei ken, aya ā geid sain naal uyu kū ta tabod ken, ā neu delē nigin usennagauf nigin wau isef. ²⁵Anī ere, gama aya Negur nē tamo kayau aruneid yaleya nigin Jerusalem elef. ²⁶Ere nigin, Masedonia provins nē sios ado Akaia provins nē sios idi, Jerusalem oun Negur nē tamo kayau atun maleg anidi isennēdiya nigin waud al fen. ²⁷Idi age fiya nigin waud al fen, momoi bagai idi, Juda idi bun wareg ado. Ere nigin, haiden idi, Juda idi neid uur nē el fiya dalen nigin, haiden idi Juda idi bun safina nē el fiya bunem wareg dūf. ²⁸Anī nigin, aya kabī enei bure afel fen, idi isennēya enei dalen anī ail fen, Spein ileya nigin asi fen, ki ayeif. ²⁹Aya keleī, sain aya ā gein asiyouf bun, aya Kristus nē el fiya barikā ado asiyouf.

^g 15:21 Asaia 52:15

³⁰Turau tar, neda Odug Jesus Kristus bunem ado Awa Uur nē wau laa fiya bunem, aya ā total bagai arokeneik, ā, neu kabī nē morō bun, aya nigin Negur kosē wiyēgouf bunem usennagouf. ³¹Aya Judia teneub bun momoiya sā imedin tamal yalelna di, neu kabī Jerusalem oun Negur nē tamo kayau an anidim dirouwauf nigin kosē gouf, ³²ago ge di, aya Negur nē oroya bunem kulīya ado ā gein asi fen, aya ā geid si tano fen, megeir alouf. ³³Wau inosiya nē Negur ā ganan bun ibodōf. Momoi.

Pol Nē Aanya

16 ¹Aya nemā mainamā Foibe, Senkria taun nē sios neid kabī kayau biya ya anī, ā keleī youf nigin arokeneik. ²Ā Negur nē tamo kayau ago wiyēdigidig gen, ī Odug bun waleg fen, ī ā bun erab lau fef anī usennēgouf, ere nigin, ī tamo kayau musei isenneid fen, ayag isennan.

³Kristus Jesus bun, neu kabī turau tar, Prisila Akwila ado, neu aanya wenēdigouf. ⁴Idi aya nigin laa uyu ditoron. Aya dogol sā, haiden neid sios gananege idi de difiyēdif.

⁵Sios idi neid fō bun guru difedig anidig, neu aanya wenēdigouf. Neu oboiyou Epenetus, Asia provins bun Kristus nigin ī ketem momoiya tamo wō yen anī, neu aanya wenēgouf.

⁶Maria ā nigin kabī total yalen anī, neu aanya wenēgouf.

⁷Neu sirag tar, Andronikus ado Junia^h idi aya geid kalabus bun mabodon anidi, neu aanya wenēdigouf. Aposel atun idi ilun bagai difaref, aya momoiya sā mog, idi ketem Kristus nigin momoi den.

⁸Ampliatu, Odug bun neu oboiyou, neu aanya wenēgouf.

⁹Urbanus, Kristus bun neda kabī turada ado, neu oboiyou Stakis, neu aanya wenēdigouf.

¹⁰Apeles ī nigin Kristus bun, tamo kayau biya difiyēdig anī, neu aanya wenēgouf.

Idi Aristobulus nē ibor anidi, neu aanya wenēdigouf.

¹¹Herodion, neu sirag, neu aanya wenēgouf.

Idi Narsisus nē ibor Odug bun dibodok anidi, neu aanya wenēdigouf.

¹²Trifena ado Trifosa, kayau idi Odug bun kabī total daledig anidi, neu aanya wenēdigouf.

Neu oboiyou Persis, kayau taka Odug bun kabī total yaledig anī, neu aanya wenēgouf.

¹³Rufus Odug bun igrinen ado, yogon sina, īg aya neu naai, neu aanya wenēdigouf.

¹⁴Asinkritus, Flegon, Hermes, Patrobas, Hermas ado, turada tar idi geid difaref anidi, neu aanya wenēdigouf.

^h 16:7 Yana enī kayau nē yana. Itotoya tunī dum ditoton, are Junias den. Junias are tamo nē yana.

15 Filologus, Julia, Nereus ī main ado, Olimpas ado, Negur nē tamo kayau ganan idi geid difaref anidi, neu aanya wenēdigouf.

16 Abob fateul bunem umā wiyēg fen, aan wiyēgouf.

Kristus nē sios ganan ā bun aanya sur difef.

17Turau tar, idi, ā Negur nigin keleī walegen anī, ditor ken, ā fara diyei ken, naabureī gudū difedig anidi lo walagauf nigin, aya ā total bagai arokeneik. Idi sese wedigouf. 18Ere nigin, tamo age fediya are, neda Odug Kristus aruna to daledig, anī ere, idi dogo neid oroya aruna daledig. Od dan biya ado mala yaleya nē od bunem, idi tamo kisi sā gen anidi didegnēdidig. 19Tamo ganan āgenei Negur nē od dō fiya biya anī karī den, anī nigin, aya ā nigin wau fatuk bagai kulī yef, anī ere, aya ā erab biya nigin kisi biya waleg fen, sane nigin soso gouf anī orouf.

20Wau inosiya nē Negur, mogo melsā Satan ā yeī farumen orok fouf. Neda Odug Jesus nē wau ifenēya ā bun ibodōf.

21Timoti, neu kabī turau, yogon aanya ā bun sur fef. Neu sirag tar, Lusius, Jeson ado, Sosipater idig age difef.

22Aya, Tertiussem pas enei atotof, Odug bun neu aanya ā bun sur afef.

23Gaius ī, aya ado ein sios ganan isennēdidig, yogon aanya ā bun sur fef.

Erastus ī taun nē moni lo fiya tamo ado, neda turada Kwartus, idi neid aanya ā bun sur difef.ⁱ

25Negur ī, neu biya od ado Jesus nigin wogōya anī bunem, ā yalesneīya kisi feleya. Biya od nē waa kulu bagai iminēyan ibodon, 26anī ere, Negur mata ibodkeleya anī, profet irokenēdi di, ditoton anī bun, kurō falaisi gama yaoren, are teneub ganan ī nigin momoi de fen, dō difouf nigin age fen. 27Negur ī yogo dogol kisi biya barikā, Kristus Jesus bunem fula fiya medeīya faimud ī bun ibodkalauf! Momoi.

ⁱ 16:23 Itotoya tunī eig de ditoton: *sur difef*. ²⁴ Ada neda Odug Jesus Kristus nē wau ifenēya, ā ganan bun ibodōf. Momoi.